



“I te cherdì con to ennom” dij le Signur.

Con le Sacramont dal Bato ven tuc sò encò tla comunità dla Dlijia:

Lisa Taibon, de Hannes y Carmen, Soröa,
Lara Ellecosta, de Andrea y Milena, Bastl
Jonas Frontull, de Matio y Sophia, Mareo
Simon Frontull, de David y Johanna, Mareo

La ploania ti fej les mius aodanzas ai geniturs: Idio, la Oma dal Ci y i Sanc Patrons acompagneii Lisa, Lara, Jonas y Simon con sòa benedisciun y proteziun.

- **Sontada dal consei de ploania en vendres ai 8 de ma** ales 19:30 te Ciasa dles Uniuns: prejentaziun dai cunc de ploania 2025, program por l'asciöda y l'isté.
- **Envit ales funziuns de ma: te dljia** la jöbia ales 19:00, **te capela a Longega** vigne sera ales 19:30, **te capela a Miscì** le dedolönesc ales 20:00.
- **Le KVV-Raiun de Puster envieia al pelegrinaje dles porsones vedoes y/o sores en domegna ai 31 de ma a Mösern im Inntal.** Enformaziuns plü avisa y prenotaziuns (i posc é limités) pa Rosa de Scionele, ☎ 345 3384551.
- **Ocio: la bena dlungia i contegnidus dal papier y dal spidl é ponsada por ciöf y erbes de cortina y porchel nia por erba privata y ater!**

1 Enformaziuns y termins

Oraziun a Oies/1: la proscima ora d'oraziun gnará tegnida en vendres, ai 8 de ma ales 20:00 te stöa dla ciasa de nosc Sant a Oies. Düc é bel enviés.

Oraziun a Oies/2: tal mens de ma él sò Oies dal dedolönesc ala domegna ales 15:30 na corona de ma, ales 16:00 na santa messa y dedô adoraziun eucaristica con meditaziun mariana.

Oraziun: en dedemesaledema ai 6 de ma, ales 20.00 vegnel tegnì te dljia da La Val na ora de oraziun por interzesciun de signor Heinrich Videsott con esposiziun dal Santiscimo.

La biblioteca adöm al Zenter Families envieia en lönesc ai 4 de ma ales 10:00 te biblioteca a na encuntada con i picì cina 3 agn por descörì deboriada le monn dai libri.

Döt le bun a: Anna Taibon ved. Pedevilla * 04.05.1932
 Georg Ploner, *Al Plan* * 05.05.1951
 Maria Willeit Comploi, *La Ila* * 07.05.1942
 Papa Leo XIV lité 08.05.2025
 y a düc chi co á santennom y compless i agn cöst'edema

Impressum: Ploania d'La Pli; redaziun Franz Rigo, Roman Frontull
Comunicaziuns: cina le dedemesaledema sera a Franz Rigo, ☎ 347 2310129 o ✉ ploania@gmx.net
Download plata: www.unitepastorala.org



Plata dla Ploania La Pli de Mareo Santa Maria dal Bun Consei

Ploan: Signor Klaus Sottsas
✉ klsottsas@rolmail.net

Calogna Al Plan: ☎ 0474 501006
Radio de Ploania: 93,00 MhZ

UNITÉ PASTORALA



Ann A

03.05.2026 - Cuinta domegna de Pasca

n. 23

Gejú Crist nosta strada


📖 St.Ap 6, 1–7 | 1 Pire 2, 4–9 | Jan 14, 1–12

Chi co ponsa che la Dlijia dai pröms tomps ne n'ái nia albü dificoltés, se fala. Ara nen jea enlaota por la dljia da tó la derta strada te sòa misciun sön la tera. Tla Storia dai Apostui nes vegnel cunté desche cösta comunità cristiana nea, la „Dlijia”, gnea tres plü grana y co ch'ara á belo enlaota salpü da organisé sù sorvisc co jea debojügn, desco la lita dai diacons (1ª letöra). La condiziun nea de vita da cristians nes ven portata a coscionza ince da san Pire co dij ch'i sun na „generaziun cherida fora, na naziun santa”, mo co se sont gonot foresta te so daciasa, te cösc monn (2ª letöra). Porchel dij Gejú a sù discepui da ne ester nia grams; y al ti empormet so daciasa, na abitaziun pa so Pere. El enstes, Gejú, é la strada co condüj enló, y al n'é degüna atra strada co porta al Pere (Vangelo).

da “Biblia di Sandis”

Dal Vangelo do San Jan:

Te chel tomp á Gejú dit a sù discepui: ¹Osc cör ne se lasci nia turbé. Cheredede te Dio y cheredede te me! ²Tla ciasa de mio Pere él trepes abitaziuns. Sc'ara ne foss nia ensciö, ves essi dit danló: I va a ves arjigné ca n post? ³Canch'i sarun jü y ves ará arjigné ca n post, vegni endô, y i ves condüji da me, por ch'i seise ince os, olache iu sun. ⁴Y olache iu va – chel tru conesceise pô. ⁵Tomesc ti á dit: Signur, i ne sán nia olache te vas. Co desson pa spo conesce le tru? ⁶Gejú ti á dit: Iu sun le tru y la verité y la vita; degügn ne rōa dal Pere ater co tres me. ⁷Canch'i m'areis conesciü, conesciareise ince mio Pere. Belo sen le conesceise y l'eise odü. ⁸Filípus ti á dit: Signur, móstresse le Pere; cösc nes basta. ⁹Gejú ti á respognü: Belo tan dio sunse pa os, y te ne m'as nia conesciü, Filípus? Chel co á odü me, á odü le Pere. Cò sciafieste pa da dí: Móstresse le Pere? ¹⁰Ne creieste nia, che iu sun tal Pere y che le Pere é te me? [...]



**Tla ciasa de mio Pere
él trepes abitaziuns.**
Jan 14, 2

📖 Letôres dla Sesta domegna de Pasca:

St.Ap 8, 5–8.14–17 | 1 Pire 3, 15–18 | Jan 14, 15–21

Edema liturgica dai 03.05. ai 10.05.2026

DOM 03.	Cuinta domegna de Pasca <i>apostui Filippo y Iaco</i>
→ 09:15	prozesciun a Curt, enló önn en vangelo y s.m. en onú de San Florian do entenziun dai Stödafüs d'La Pli y d'Al Plan s.m. de ringraziament por les families Ritsch, Tomele da Rara s.m. por † Jep Ellecosta, dal Stifler <i>♪ Musiga d'Al Plan</i> s.m. por † Paul Pedevilla, La Munt
14:00	funziun dal Bato de Lisa Taibon, Lara Ellecosta, Jonas Frontull y Simon Frontull
Lön 04.	<i>Florian (patron da Curt), Guido, Valeria</i>
19:00	s.m. por † Jep Rindler, Nichele s.m. por †† Canzio y Maria Willeit, Blaje/Laronz
Ded 05.	<i>Godehard, Sigrid</i>
07:30	s.m. a Antermeia
Dem 06.	<i>Antonia</i>
Jöb 07.	<i>Gisela</i>
→ 19:00	corona de ma
Ven 08.	<i>Friedrich, Ulrich, beata Ulrika Nisch</i>
07:30	s.m. a Al Plan
Sab 09.	<i>Beatus, Tarejia</i>
07:30	s.m. en onú de Santa Maria s.m. por † Franz Kastlunger, Alnei
18:00	s.m. <i>prefestia a Al Plan</i>
DOM 10.	Sesta domegna de Pasca – De dla oma <i>Damian de Veuster, Jan da Ávila</i> FESTA DLA PRÖMA SANTA COMEGNUN
→ 09:45	i acompagnun les 3 mitans y i 10 mituns dla Pröma Santa Comegnun da paiun sö te dlíia <i>♪ grup de mituns y mitans</i> gran messa por i comunicanc y söes families y por döta la ploania s.m. de ringraziament por Herbert y Edith Frontull, Casun s.m. por la pêsc
10:00	<i>gran messa a Al Plan</i>
<i>ampola:</i>	do entenziun de na familia
<i>ministronc:</i>	lönesc y sabeda: Aileen Ellecosta y Lena Palfrader domegna: Clara Obkircher y Lucrezia Winkler, Sara Feichter y Sofia Ellemunter
<i>i recordun:</i>	Giuseppe Ploner, Chatillon † 04.05.2019

Periun! Dio gran y gaiert, te i as scinché a san Florian y a sü compagns la grazia da testimonié la fede te Crist con la mort. Por söa interzesciun conzédesse proteziun y aiüt y dassé ince a nos le coraji da confessé la fede zonza pora. Por Gejú Crist, nosc Signur.– Amen.



Posc rresservés (Jan 14, 1–12)

I ponsi do

Gejú s'arjigna ca da lascé la tera. Al n'é nia en adio: el sará ennant pa nos. Jí sòn so tru, ti orei bun con döta nosta vita y acutée söa Parora de verité é la maniera da romagne con el. Sö al ci él por vignönn en post belo arjigné. I ne le ciafun nia da cumpré con scioldi y al n'é nia n pest por i plü fortunés: al é na scincunda, früt de so amur y de söa misericordia. Nos án la responsabilité da tó ete o da perde cösc post.

I preii ensciö

Gejú, sará ince mio post tla ciasa dal Pere? Recordete pa da meter mio ennom bel da odei por che degügn d'atri ne se sonti jö enló y ch'al sii sogü lede y arjigné canch'i vegni sö da te. Mo samben ch'i messi m'al merité! I mo comportará desch'al alda, jará a messa, ne dijará nia de bortes parores, soportará mi fredesc, fajará i laurs con lezitonza ... Cösc ne basta nia, catö? O él massa trep? Al n'é de chi co s'al davagna con tre' de manco, mo ince de chi co le perd por matades. Nos san che le post é tó, ma tö s'al as arjigné ca a nos. Tö l'as cumpré a en prisc der alt y a nos s'al daste debann. A te t'ál costé la vita y a nos s'al piteste por podei vire con te por dagnora. Tö es en compagn demorveia, Gejú. lu ó ince te dé en post, le miú: chel te mio cör.

Oraziun dan da na raprezentaziun de Santa Maria



Oh Maria, tö lomines dagnora söle tru de nosta vita, desco segno de salveza y speranza.

I se sorandun a te, tö che a pe dla crusc aste uní to dolur a chel de to fi Gejú y te es dagnora stada frema te töa fede.


Tö, salveza de to popul, te sas avisa de ci ch'i an debojügn, y i sun ince sogüsc che tö fistidieies de nos, por che al poi, desco enlaota a Cana tla Galilea, ince por nos gní la ligreza y la festa do vigne momont de proa.

Deidesse, oma dal amur divin, da azeté la orente dal Pere y da fá ci

che Gejú nes dijara, el co s'á ciarié sö a se enstes nosc dolur por nes condü, tres la crusc, ala ligreza dla ressozeziun. - Amen. *„Laldun le Signur“ 8,5*



Unité Pastoral Val Badia



CREJIMA 2027

Ince en ater ann sarál la poscibilité da ciafé le Sacramont dla Crejima tla Val Badia, en domegna blancia **ai 4 d'aurí 2027**, por düc i jogn co á complí por danló i **16 agn** y á tut pert a dötes les 8 incuntades de preparaziun. Cösta peia ia con na pröma encuntada ai 6 de jügn 2026 y vá ennant da setember 2026 cina merz 2027 te na encuntada de 2 ores n iade al mens.

Düc i interessés de döta la valada, jogn y jones con sü geniturs (y ev. toc/totes), é der bel enviés a na sera de enformaziun en vendres, ai 22 de ma dales 19:30 tl Istitut Ladin a San Martin.